

Des glich jr narrheyt ouch erscheynen  
Die vmb eyn dotten / truren / weynen /  
Vnd jm vergünnen syner rüw  
So wir doch all begeren zü /  
Dann keyner fert zü früg do hyn  
So er muß / ewicklichen syn  
So gschicht gar manchem wol dar an  
Das gott jm rufft zyttlich hyn dan  
Der dott ist manchem nütz gesyn  
Das er on wart / trüpsal / vnd pin /  
Vil hant den dot ouch selb begert  
Der dott vil dancks an den bewerdt  
Zü den er kam / ee man jm ruff /  
Vil gefangen er jnn fryheyt schüff  
Vil hat er vß dem kercker bracht  
Den der was ewicklich eracht /  
Das glück deilt vnglich güt / vnd rich  
Aber der dot macht es alls glich  
Der ist eyn richter / der gantz nytt  
Ettwas abloßt / durch yemans byt /  
Der ist alleyn / der all ding lont /  
Der ist / der nye keym ye hat gschont  
Nye keym gehorsam er ye wart  
Sye müsten all vff syne fart  
Vnd dantzen jm noch synen reyen  
Vnß / keyser / künig / bischöff / leyen  
Der mancher noch nit hat gedacht  
Das man den vordantz jm hatt bracht  
Das er muß dantzen an dem gzotter  
Den westerwelder / vnd den drotter

